

exemple les autres vieillards à parler publiquement en faueur de la Foy, & neantmoins il n'estoit encore que Catechumene. Mais il desiroit avec tant d'ardeur d'estre baptisé, que le P. Buteux estant entré vn iour dans sa cabane & l'ayant trouué extraordinairement triste & affligé, comme il luy en demandoit la raison; N'ay-ie pas fuiet, dit-il, de m'attrister? tu m'auois promis de m'enseigner souuent, & tu ne m'as dit mot aujourd'huy. Que sçay-ie ce qui m'arriuera? peut estre les Iroquois font ils proches. Je suis en danger de mourir sans baptesme, ou de le receuoir avec fort peu de [204] cōnoissance & de fruiçt si tu ne te hastes de m'enseigner. Il fallut luy dōner cette consolation, & le baptiser avec ses deux filles, dont l'aînée est d'un naturel grandement porté à la deuotion, qu'elle a communiqué à son mary, le rendāt autant affectionné à la priere qu'il en étoit estoigné auparavant, & aliene. Elle se seruit d'une fainte tromperie pour hâter son baptesme, persuadant au Pere qu'elle s'en iroit bien tost dans les bois. Voy tu bien, luy dit-elle, ie me dispose à partir au premier iour, ie cōmence à plier mes escorces, ie mourray sans baptesme, & tu en auras du regret aussi bien que moy. Attends, luy dit le P. Buteux, tu n'as pas plus de haste que ton Pere. Je sçay les prieres mieux que luy, repliqua-t'elle, pourquoy l'attendrois-ie?

Si on eust accordé le Baptesme à tous ceux qui le demandoient, ils feroient desia quasi tous baptifez. On n'a peu neantmoins le refuser à vne bonne femme, qui à vray dire semble vne autre S^{te} Monique, ayant autant de zele pour le baptesme de sō fils que celle-là en auoit pour la conuersion de S. Augustin. Aussi [205] en vint-elle à bout, & fut baptifée avec